

## JONES, WILLIAM PHILIP (1878 - 1955), gweinidog (MC) a phrifathro coleg Trefeca

**Enw:** William Philip Jones  
**Dyddiad geni:** 1878  
**Dyddiad marw:** 1955  
**Priod:** Gwendolen Jones (née Lewis)  
**Rhiant:** Margaret Jones  
**Rhiant:** Edward Jones  
**Rhyw:** Gwryw  
**Galwedigaeth:** gweinidog (MC) a phrifathro coleg Trefeca  
**Maes gweithgaredd:** Crefydd; Addysg  
**Awdur:** Gomer Morgan Roberts

Ganwyd 21 Tachwedd 1878 yn Rock House, Tre-ffin, Penfro, mab Edward a Margaret Jones. Bu farw'i dad pan oedd yn bum mlwydd oed, a dychwelodd ei fam i'w chynefin yn Nanhyfer. Addysgwyd ef yn ysgol elfennol Nanhyfer, ac yn ysgolion gramadeg Llandysul a Chastellnewydd Emlyn. Dechreuodd bregethu yn 15 mlwydd oed yng Ngethsemene, Nanhyfer, ac aeth i'w baratoi ei hun ar gyfer y weinidogaeth i Goleg y Brifysgol, Caerdydd, lle graddiodd gydag anrhydedd yn y clasuron. Aeth wedyn i goleg Trefeca lle graddiodd mewn diwinyddiaeth. Cafodd radd M.A. Prifysgol Cymru am draethawd ar gystrawen Groeg y *Testament Newydd*. Ordeiniwyd ef yn 1904, a'r flwyddyn ddilynol priododd Gwendolen Lewis, Abergwaun; ganwyd mab a dwy ferch o'r briodas. Bu'n gweinidogaethu yn eglwysi Pen-towr, Abergwaun (1903-06), Penffordd a'r Gwastad (1906-10), Jerusalem, Pontrhyd-y-fen (1910-12), Bethlehem, Treorci (1912-15) a Phenffordd a'r Gwastad (1915-26). Sefydlodd eglwys i'r MC yng Nghlunderwen y tro cyntaf y bu ym Mhen-ffordd. Penodwyd ef, yn 1926, yn brifathro coleg Trefeca, a bu yno hyd ei farwolaeth. Yr oedd yn athro da a llwyddiannus, a chyflawnodd waith mawr yn Nhrefeca ynglŷn â'r adeiladau hynafol yno; casglodd filoedd o bunnoedd i sefydlu cronfa ar gyfer hynny. Cyhoeddodd werslyfr ar Efengyl Marc - yn Gymraeg ac yn Saesneg - yn 1912, a chyfrol ddwyieithog, *Coleg Trefeca, 1842-1942*, yn 1942. Ysgrifennodd yn achlysurol i'r *Goleuad*, *Y Lladmerydd*, a *Chylchgrawn Cymdeithas Hanes y Methodistiaid Calfinaidd*. Bu'n ffigur amlwg ym mywyd ei gyfundeb, a bu'n llywydd Sasiwn y De yn 1945. Bu farw yn nhŷ capel y Dyffryn, Tai-bach, lle'r oedd yn pregethu dros y Sul, 3 Gorffennaf 1955, a chladdwyd ei weddillion yn Abergwaun.

### Awdur

Y Parchedig Gomer Morgan Roberts, (1904 - 1993)

### Ffynonellau

*Blwyddiadur y Methodistiaid Calfinaidd*, 1956, 257

W. M. Jones, *Pentour, Abergwaun* (1959) (sic), Abergwaun (1959), 43-4

*Y Goleuad*, 27 Gorffennaf 1955

*Y Drysorfa*, 1945, 47-50

*Who's who in Wales* (1921), 264

gwybodaeth gan ei ferch, Miss Gwyneth Jones, Abergwaun

adnabyddiaeth bersonol

### Dolenni Ychwanegol

Wikidata: [Q20734695](https://www.wikidata.org/wiki/Q20734695)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

